

Ni Presidente Dieter F. Uchtdorf

Maikadua a Mammagbaga iti Umuna a Panguluén



Ti Balikas ti Dios kadagiti Annakna

Ibaga dagiti nasantuan a kasuratan kadayo a ti umuna a banag nga inaramid ti Dios kalpasan ti panangparsuana iti lalaki ken babai ket kinasuana ida.¹ Adda napateg a pakaammo ken napateg a pangiturong nga intedna kadakuada. Ti panggepna ket saan a mangpadagsen wenno mangburibor kadakuada ngem di ketdi mangtarabay kadakuada iti kinaragsak ken iti agnanayon a gloria.

Ket dayta laeng ti nangrugianna. Manipud iti dayta nga aldaw agingga itoy, intultuloy ti Dios ti nakisao kadagiti annakna. Dagiti balikasna ket tinaginayon, impateg, ken inadal dagiti disipulona iti tunggal henerasion. Dagitoy ket dinayaw dagiti nagkalikagum a mangammo iti pagayatan ti Dios, ket pinaneknekanda iti kinapudno nga “awanto ti aramiden ti Dios, no di ipalgakna ti palimedna kadagiti katulonganna a dagiti propeta.”²

Daytoyen ti pagtuladan manipud pay idi punganay ti panawen, ken agtultuloy ti pagtuladan agingga iti agdama. Daytoy ket saan laeng a napintas nga estoria iti Biblia; daytoy ti naipasdek a wagas ti Dios a panakaisao dagiti napapateg a mensahe kadagiti annakna. Intag-ayna dagiti tao manipud iti nagbabaetantayo, inawaganna ida nga agbalin a propeta, ken inikkanna ida kadagiti balikas nga isawang a nakaawisantayo nga “umawat, a kasla naggapu iti bukod[na] a ngiwat.”³ Impakdaarna, “Babaen man ti bukodko a timek wenno babaen ti timek dagiti katulongak, agpada daytoy”⁴

Daytoy ti maysa kadagiti kadayagan, karegtaan, ken makanamna unay a mensahe ti Panakaisubi—saan a naulimek ti Dios! Ay-ayatenna dagiti annakna. Saanntatayo a pinanawan tapno mayaw-awan iti kasipngetan.

Mamindua iti tunggal tawen, iti Abril ken Oktubre, addaantayo iti gundaway a dumngeg iti timek ti Apo babaen dagiti katulonganna kadagiti nakaskasdaaw a sapasap a komperensiatayo.

Personal a paneknekak kadakayo a nabayag sakbay a makapagsarita iti podium ti maysa a bumibitla iti sapasap a komperensia, nakaaramiden iti dakkel a panagkagumangan, panagkararag, ken panagadal kas sungbat iti naituding a panagsaritana. Tunggal mensahe iti komperensia ket mangibagi iti saan a mabilang nga oras ti panagsagana ken naimpusuan a pakaasi tapno maawatan no ania ti tarigagayan ti Apo a mangngegan dagiti Santona.

Ania ti mabalin a mapasamak no datayo kas dumdungeg ket ituladtayo ti bukodtayo a panagsagana iti panagsagana dagiti bumibitla? Kasano a maiduma ti approachtayo iti sapasap a komperensia no nakitatayo a ti komperensia ket maysa a gundaway tapno umawat kadagiti mensahe manipud iti Apo Mismo? Babaen dagiti balikas ken musika ti sapasap a komperensia, manamnamatayo ti umawat kadagiti personal a sungbat kadagiti ania man a saludsod wenno problema a mabalin a pakaipaspasangantayo.

No panunotenyo no talaga a makisaritanto kadakayo ti Nailangitan nga Ama, ipalagipko kadakayo dagiti simple ngem naipangpangruna a balikas a kankantanten dagiti ubbing iti Primary: “[Dakayo] ti anak ti Dios, imbaonna[kayo] ditoy.” Panggepna a tulongannakayo nga agsubli “nga agnaed iti sidongna iti maysa nga aldaw.”

No asitganyo ti Nailangitan nga Ama kas anakna, maidawatmo Kenkuana nga addaan iti napudno a puso,

“Iturongnak, idalannak, tarabayennak. Isuronak ti aramidek.” Makisaritanto kadakayo babaen ti Nasantuan nga Espirituna, ken adda kadakayo no “aramidenyo ti pagayatanna.” Ikarik kadakayo a no aramidenyo, “nakasagana dagiti nawadwad a bendision.”⁵

Kasapulan ita ti pannarabay ti Apo kas iti panagkasapulan unay iti pakasaritaan ti lubong. Bayat ti panagsaganatayo a dumngeg iti balikas ti Apo, makapagtallugodtayo koma nga agkalikagum a manggun-od iti Espiritu ti kinapudno tapno no agsarita ti Apo babaen dagiti katulonganna, makaawattayo, mapadur-astayo, ken agrag-otayo a sangkamaysa.⁶

Paneknekak a “babaen ti panangaramid[tayo] kadagitoy a banag saanto nga agballigi [kadatayo] dagiti ruangan ti impierno; wen, ket paksiatento ti Apo a Dios dagiti bileg ti kasipngetan iti imatang[tayo], ket padayyegennanto dagiti langit nga agpaay iti pagimbagan[tayo], ken iti dayag ti naganna.”⁷

DAGITI NAGADAWAN

1. Kitaen iti Genesis 1:28.
2. Amos 3:7
3. Doktrina ken Katulagan 21:5
4. Doktrina ken Katulagan 1:38.
5. “I Am a Child of God,” *Hymns*, no. 301; *Children’s Songbook*, 2–3.
6. Kitaen iti Doktrina Ken Katulagan 50:21–22.
7. Doktrina ken Katulagan 21:6.

PANANGISURO MANIPUD ITI DAYTOY A MENSAHE

Kabayatan ti sapisap a komperensia makaawattayo kadagiti personal a sungbat kadagiti saludsod ken problema kabayatan ti idedengngegtayo kadagiti natudingan a katulungan ti Dios. Ibilangyo ti panangilawlawag iti sumaganad kadagiti sursuruanyo: Kasano a makapagsaganakayo nga umawat kadagiti kasta a sungbat kabayatan ti sapisap a komperensia? Inallukoynatayo ni Presidente Uchtdorf a “sipapasnek a manggun-d iti Espiritu ti kinapudno.” Ania iti panagkunayo a kayat a sawen dayta, ken no kasano a maikaykaysayo daytoy iti panagsaganayo? Kas pangnayon kadagiti bendision a nadakamat iti Doktrina ken Katulagan 21:6, ania pay dagiti dadduma a bendision a sumangbay bayat ti panagsaganayo a dumngeg kadagiti balikas ti Apo babaen dagiti katulonganna? Mabalinyo nga awisen dagiti sursuruanyo a mangisurat iti journalda no ania ti isuro ti Espiritu kadakuada iti daytoy a sapisap a komperensia.

AGTUTUBO

Panagsagana a Dumngeg iti Timek ti Dios

Lawlawag ni Presidente Uchtdorf no kasano a ti umuna a banag nga inaramid ti Dios kalpaskan ti panagparsuana iti lalaki ken babai ket nakisao kadakuada ken inikkanna ida kadagiti napapateg a pakaammo ken pangiturong. Magun-odtayo dayta kasta met la a bendision iti Abril ken Oktubre kabayatan ti sapisap a komperensia, no agsarita kadatayo dagiti leader iti Simbaan ket ikkandatayo iti balakad a kayat ti Apo a denggentayo.

Nangngeganyo kadin ti timek ti Dios babaen dagiti katulonganna kabayatan ti sapisap a komperensia? Nariknayo kadin kas iti maysa a nalawag a mensahe a nangted kadakayo iti sungbat a sinapsapulyo? Iti journal, mabalinyo nga isurat dayta a padas ken no kasano a natulongannakayo daytoy. Kalpasanna agsaganakayo a dumngeg iti timek ti Apo iti daytoy nga umay a komperensia babaen ti panangisuratyo kadagiti adda a saludsodyo ken panagadal kadagitoy kabayatan ti panagadalyo iti nasantuan a kasuratan. Agkararagkayo iti Nailangitan nga Ama, nga idawdawat nga umawat-kayo kadagiti sungbat ken nalawag a pannakaawat kabayatan ti komperensia. Bayat ti idedengngegyoy kadagiti katulungan ti Apo, agpokuskayo kadagiti bukod a parikna. Ania ti nasursuroyo? Ania ti nariknayo a makaparegta a balbaliwan? Isuratyo dagita a parikna gapu ta makisarsarita kadakayo ti Espiritu!

Laglagipenyoy a kanayon nga ay-ayatennakayo ti Nailangitan nga Ama ken tarabayennakayonto iti umno a turongen. Bayat ti panangikarigatanyo a dumngeg iti timekna babaen dagiti katulonganna, mabendisionan ken dumur-askayonto.

ANNAK

Agsaganakayo para iti Komperensia!

Isuratyo dagitoy a parikna iti maysa a panid ti papel. Itugotyo ti papel kabayatan ti komperensia tapno maisuratyo no ania ti nasursuroyo.

Isuratyo dagiti saludsodyo. Pampanunotek ti maipapan iti . . .

Agkararag iti Nailangitan nga Ama. Kayatko ti tulong iti panangsursuro maipapan iti . . .

Dumngeg iti sapisap a komperensia. Nasursurok ti . . .



Ikararagan ti Tunggal Kabsat a Babai babaen ti Naganna

Dumakkelto ti ayat ken pammaregtatayo maipanggep kadakuada no sipapakumbaba nga ikararagantayo ti tunggal kabsat a babai nangnangruna no babaen ti naganna.

Pammati, Pamilia, Tulong

Ibinglay dagiti nasantuan a kasuratan ti adu a pagarigan dagiti lallaki ken babai a nangikararagan kadagiti dadduma babaen ti naganda. Maibilang kadagiti makasagid-rikna ket ti ama ni Alma nga Ub-ubing. Nakisao ti maysa nga anghel ken ni Alma nga Ub-ubing, a mangibagbaga kenkuana a ti amana ket "nagkararag a napnuan pammati maipanggep kenka . . . ; ngarud, daytoy ti gapu ti immayak tapno allukoyenka iti bileg ken turay ti Dios, tapno masungbatan ti karkararag dagiti katulonganna a maibatay iti pammatida" (Mosiah 27:14).

Ti panangikararagan iti tunggal maysa ket manglukat iti puspusotayo nga umawat kadagiti bendision a tartarigagayan ti Apo nga ited kadatayo. Ti panggep ti kararag ket saan a mangbalbaliw iti pagayatan ti Dios ngem ketdi mangpatalged para iti bagbagitayo ken para iti dadduma kadagiti bendision a siaayat nga ipaay ti Dios, ngem nasken a kiddawentayo tapno magun-odtayo."¹

Maysa a kabsat a babai ti nangisalaysay a kabayatan ti narigat

a panawen ti biagna, ti tawag iti telepono wenno simple a mensahe iti teks ti masansan nga aggapu kadagiti visiting teacher na kadagiti "nangnangruna a nalidem nga aldaw." Kasla ammoda a kasapulanda laeng ti panangparegta. Ammona nga inkararaganna ida, agpada a kabayatan dagiti isasarungkar ken iti bukodda.

"Panunoten ti nagtipon a pigsatayo no naimpusuan a nagkararag ti maysa a kabsat a babai iti tunggal bigat ken rabii, wenno, nasaysayaat, awan sardayna nga agkararag kas iti imbilin ti Apo," kinuna ni Julie B. Beck, sigud a General Relief Society President.² Ti panangikararagan kadagiti sarungkar ken suruanta-yo ket mangpapigsa kadatayo kas tao ken kas babai a Santa iti ududina nga aldaw.

Kinuna ni Presidente Henry B. Eyring, Umuna a Mammagbaga iti Umuna a Panguluen: "Ikararaganyo ti wagas tapno maammuan ti kaunganda. . . . Nasken a maammuan-yonto no ania ti ipaaramid ti Dios kadakayo a makatulong kadakuada

ken aramiden amin daytoy, agingga a kabaelanyo, a mangrikna iti ayat ti Dios para kadakuada."³

DAGITI NAGADAWAN

1. Pangiwanwan iti Nasantuan a Kasuratan, Kararag"
2. Julie B. Beck, "What Latter-day Saint Women Do Best: Stand Strong and Immovable," *Liahona*, Nob. 2007, 110.
3. Henry B. Eyring, "Priesthood and Personal Prayer," *Liahona*, May 2015, 85.

Ibilang Daytoy

Ania ti kaudian nga inspirasion ken dagiti kapanunotan nga immay kadakayo idi inkararaganyo para kadagiti kakabsat a babai a sarungkar ken suruanyo?

Panangaywan

Babaen ti panangikararagan iti tunggal kabsat a babai babaen iti naganna, umawattayonto iti bukod nga inspirasion a mangammo no kasano nga ipaaytayo dagiti kasapulan ti tunggal kabsat a babai a sarungkarantayo.